



27. januar 2015

UPA 2015/139

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera pillugu apeqquteqaat aallaavigalugu oqallisissiaq.
(Inuit Ataqatigiit Inatsisartunut ilaasortaataita)

Inuiaqatigiinni suliffissaaleqineq ilaqutariippassuarnut ukiuni matumanerpiaq erloqisitseqisoq annertuvoq, minnerunngitsumik inuusuttorpasuit eqqugaasimanerannik kinguneqarluni. Ajornartorsiut milliartortutut misinnanngilaq inuusuttullu suliffissaaleqinerat immikkut iliuuseqarfigisariaqarnera saneqqukkuminaalluinnarpoq naalakkersuinikkullu suliaqartut tamarmik inuusuttut suliffissaaleqisinneqarnerannut akiuiniarnermi peqataanissamut pisussaaffeqarput.

Inuit Ataqatigiit inuusuttortaasa sineriammi oqallitsitsisarnerini maluginiagassaavoq inuusuttut suliffissaaleqinermi siunnersorneqarnissaat, ilinniarnernermik sulinermillu aallartinnissaannut pisortat ikorfartuillutillu malinnaasarnissaat pisariaqartutut isigineqarmat. Inuusuttut kommuunip allaffianut suliffissarsiortutut naqitsikkiartuinnartarnertik naammaginngilaat. Taassuma saniatigut katsorsaavinnik inuusuttunut tulluussakkanik ujartuisoqarpoq. Inuusuttut amerlasoorpassuit ilinniarnerminnik sulinerminnillu taamaatitseqqasut inuunermik alloriarfiusinnaasumik ujaasipput. Inuit Ataqatigiit inuusuttortaata ilisimatitsipput kommuunip aningaasaatai apeqqutaallutik katsorsartinniartut inuusuttut arlalippasuit akuerisaanngitsoortartut, tamannalu periuseq allanngortinneqarnissaa ujartorneqarpoq.

Inuusuttut Ataqatigiit naammaginngilaat Piareersarfiit kisiisa annertusarneqarnissaanik isumaqarluni politikkeqarneq, tamanna ikkattumik aaqqiiniarnertut oqaatigineqarluni. Siunissami Piareersarfiit atorunnaariartornissaat inuusuttunit arlalinnit saqqummiuneqartarpoq.

Inuusuttortatta arlaleriarlutik tusagassiuutitigut siunnersuutigisarpaat Inatsisartut imaluunniit Naalakkersuisut kommuunit peqatigalugit inuusuttut suliffissaaleqinerat pillugu nalunaarusiortariaqalersut inuusuttullu suliffissaaleqinerat akiorniarlugu iliuusissanik tigussaasunik maannakkut tikkuussisariaqartut.

Inuit Ataqatigiit Inatsisartunut ilaasortaataitaasa inuusuttortatta siunissartik pillugu ernummateqarmata paasisinnaalluarpagut aammalu immikkut iliuuseqaqqusinerannut isumaqataalluta, soorlu siuliini oqaatigineqareersutuut.

Isumaqarpugut soqutiginaruussasoq tusassallugu partiit ataasiakkaat aammalumi Naalakkersuisut inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera pillugu isumaqanersut?

Isumaqatigiinnginnerup annertunerusup pilersinnissaa siunertaangilaq. Siunertaavoq Nunatsinni, minnerunngitsumik inuusuttortavut eqqarsaatigalugit – kikkut tamarmik pitsaasumik siunertaqarlutik politikikkut neriuutiminnik, isummersuutiminnik ernummatiminnillu saqqummiinissaat.

Tamassi torersumik pilersitsiffiulluuartumillu oqalliseqataanissassinnik kissaappassi.